

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ

ՀԱՅՏԱՐԱՐՈՒԹՅՈՒՆ

ԲՈՂՈՔԻ ՆԵՐԿԱՅԱՑՄԱՆ ՎԵՐԱԲԵՐՅԱԼ

Բողոքի ծածկագիրը և ամսաթիվը՝ ԳԲՔԱ-ԼՕ-2021/109, 25.11.2021թ.

Բողոք բերող անձ՝ «Լեյկո» ՍՊԸ

Պատվիրատու՝ «Երևանի Մխիթար Հերացու անվան պետական բժշկական համալսարան»
հիմնադրամ

Գնման ընթացակարգի ծածկագիրը՝ «ԷԱՃԱՊՁԲ-2022/16-7-ԵՊԲՀ» էլեկտրոնային աճուրդ

Գնման առարկան՝ բժշկական նշանակության ապրանքների ձեռքբերում

Բողոքի պահանջը՝ պարտավորեցնել «ԵԲ-ԷԱՃԱՊՁԲ-22/3» ծածկագրով էլեկտրոնային աճուրդի գնահատող հանձնաժողովին՝ ընդունելու որոշում գնման ընթացակարգը չկայացած հայտարարելու մասին:

**ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ՝ Լ. ՕՀԱՆՅԱՆ
ՔԱՐՏՈՒՂԱՐ՝ Լ. ԱՆԱՆԻԿՅԱՆ**

Նիստերին կարելի է առցանց հետևել <https://www.e-gov.am/gnumner/> հղումով.

Տեղեկացնում ենք, որ «Գնումների մասին» ՀՀ օրենքի՝

- 50-րդ հոդվածի 10-րդ մասի համաձայն՝ յուրաքանչյուր անձ, որի շահերը խախտվել են կամ կարող են խախտվել բողոքարկման հիմք ծառայած գործողությունների արդյունքում, իրավունք ունի մասնակցելու բողոքարկման ընթացակարգին՝ մինչև բողոքի վերաբերյալ որոշում ընդունելու ժամկետը գնումների հետ կապված բողոքներ քննող անձին ներկայացնելով համանման բողոք: Նույն հոդվածի համաձայն՝ բողոքարկման

ընթացակարգին չմասնակցած անձը զրկվում է գնումների հետ կապված բողոքներ քննող անձին համանման բողոք ներկայացնելու իրավունքից,

- 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ նույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

ՀՀ գնումների հետ կապված բողոքներ քննող անձին

Բողոք բերող անձ՝ «ԼԵՅԿՈ» ՍՊԸ

Պետական գրանցման համարը՝ 271.110.01967

ՀՎՀՀ՝ 01224924

Գտնվելու վայրի հասցե՝ ք. Երևան, Ֆուչիկի 27/14

Տնօրեն՝ Գագիկ Լենդրուշի Ալեքսանյան

Հեռ.՝ 098350303

«ԷԱՃԱՊՁԲ-2022/16-7-ԵՊԲՀ» ծածկագրով

Էլեկտրոնային աճուրդի Պատվիրատու՝

Երևանի Մխիթար Հերացու անվան պետական բժշկական համալսարանի հիմնադրամ

Հասցե՝ ք. Երևան, Կորյունի փող., 2 շենք

ԲՈՂՈՔ

Երևանի Մխիթար Հերացու անվան պետական բժշկական համալսարանի հիմնադրամի /այսուհետ՝ Պատվիրատու/ կողմից նախաձեռնվել է գնման ընթացակարգ՝ էլեկտրոնային աճուրդ՝ «ԷԱՃԱՊՁԲ-2022/16-7-ԵՊԲՀ» ծածկագրով /այսուհետ նաև՝ Աճուրդ/։ Աճուրդը նախաձեռնվել է Պատվիրատուի կարիքների համար բժշկական նշանակության ապրանքների ձեռքբերման նպատակով (գնման առարկան)։ Աճուրդի հայտարարությունը և հրավերը 15.11.2021թ.-ին հրապարակվել են գնումների տեղեկագրում, և հրավերով սահմանված կարգով և ժամկետում՝ մինչև 22.11.2021թ.-ի ժամը 11:00-ն, «ԼԵՅԿՈ» ՍՊԸ-ի /այսուհետ՝ **Ընկերություն**/ կողմից ներկայացվել է թվով 21 չափաբաժինների մասով Աճուրդին մասնակցելու հայտ։

Աճուրդի հրավերի 8.2 կետի համաձայն՝ էլեկտրոնային աճուրդը պետք է սկսվեր 23.11.2021թ.-ի ժամը 11:00-ին։ Աճուրդով գնման առարկա ապրանքները խմբավորված էին թվով 50 չափաբաժիններում, իսկ էլեկտրոնային աճուրդը կազմակերպվում է միաժամանակ առավելագույնը վեց չափաբաժնի համար՝ համաձայն Աճուրդի հրավերի 8.3 կետի, որպիսի պարագայում յուրաքանչյուր հաջորդող վեց չափաբաժնի համար էլեկտրոնային աճուրդը սկսվում է չափաբաժինների նախորդ խմբի էլեկտրոնային աճուրդի կազմակերպման համար սահմանված 30 րոպեն սվարտվելուց անմիջապես հետո։ Այսինքն՝ ստացվում է, որ կոնկրետ վեց չափաբաժնի մասով էլեկտրոնային աճուրդի մասնակիցը իր նվազեցվող գները կարող է առաջարկել միայն այդ վեց չափաբաժինների համար հատկացված ժամանակում՝ 30 րոպեում, իսկ առաջին տեղը զբաղեցրած մասնակից է համարվում վերջին քայլը կատարած մասնակիցը։

Ակնհայտ է, որ Աճուրդի հրավերի 8.2-8.4 կետերով սահմանված էլեկտրոնային աճուրդի անցկացման կարգն ու պայմանները կարող են իրացվել և ապահովվել միայն, մասնակիցների գործողություններից զատ, նաև eauction.armeps.am էլեկտրոնային գնումների համակարգի անխափան աշխատանքի դեպքում։ Մինչդեռ, նշենք, որ Աճուրդի շրջանակներում էլեկտրոնային աճուրդի կազմակերպման օրը՝ 23.11.2021թ.-ին, eauction.armeps.am էլեկտրոնային գնումների համակարգն աշխատել է խափանումներով, ինչի պատճառով Ընկերությունը, որը վերոնշյալ 50 չափաբաժիններից 21-ով Աճուրդին

մասնակցելու հայտ էր ներկայացրել, օբյեկտիվորեն գրկված է եղել այդ չափաբաժիններից մի մասի կապակցությամբ կայացած էլեկտրոնային աճուրդին մասնակցելու ու իր նվազեցվող գներն առաջարկելու, ըստ այդմ՝ առաջին տեղը զբաղեցնելու, հետագայում նաև պայմանագիր կնքելու, ապրանքները մատակարարելու և շահույթ ստանալու հնարավորությունից:

eauction.armeps.am էլեկտրոնային գնումների համակարգի խափանման պատճառով Ընկերությունը գրկվել է «Գնումների մասին» ՀՀ օրենքի 7-րդ հոդվածի 1-ին մասով ամրագրված գնման գործընթացին մասնակցելու իր իրավունքն իրացնելու հնարավորությունից՝ նկատի ունենալով, որ էլեկտրոնային աճուրդը ևս գնման գործընթացի փուլերից է, և գնման գործընթացին մասնակցելու Ընկերության իրավունքը կարող էր իրացված համարվել միայն այդ դեպքում, երբ հայտերը ներկայացնելուց բացի, Ընկերությունը հնարավորություն ունենար նաև մասնակցելու էլեկտրոնային աճուրդին՝ առաջարկելով իր նվազեցվող գները՝ այդպիսով իրական հնարավորություն ունենալով զբաղեցնելու առաջին տեղը: Այնինչ, արձանագրենք, որ իրենից անկախ պատճառներով՝ էլեկտրոնային գնումների համակարգի խափանման պայմաններում, Ընկերությունը չի կարողացել իրացնել գնման գործընթացին մասնակցելու իր իրավունքը՝ դրանից բխող բոլոր անշահավետ հետևանքներով հանդերձ, ներառյալ՝ շահույթ ստանալու հնարավորությունից գրկվելը:

Ընդ որում, նկատենք, որ Աճուրդի հրավերի 11.1 կետի 2-րդ պարբերության համաձայն՝ «սույն ընթացակարգը Օրենքի 37-րդ հոդվածի 1-ին մասի 4-րդ կետի հիման վրա հայտարարվում է չկայացած, եթե սույն ընթացակարգի շրջանակում սահմանված հայտերի ներկայացման և/կամ տվյալ չափաբաժնի գծով աճուրդի իրականացման վերջնաժամկետը լրանալու պահի դրությամբ էլեկտրոնային գնումների համակարգը խափանված է»: Հետևաբար, ստացվում է, որ տվյալ դեպքում Աճուրդը պետք է հայտարարվի չկայացած, քանզի թվով 50 չափաբաժիններից մոտ 30 չափաբաժնի մասով կազմակերպված էլեկտրոնային աճուրդի համար սահմանված 30 րոպեի ամբողջ ժամանակահատվածում էլեկտրոնային գնումների համակարգը եղել է խափանված, ինչն էլ գրկել է Ընկերությանը դրանցից վերաբերելիների մասով իր գներն առաջարկելու և իր վերոնշյալ իրավունքն իրացնելու հնարավորությունից:

Վերոնշյալ փաստական և իրավական հիմքերն ու հիմնավորումները պարունակող դիմում է Ընկերության կողմից 23.11.2021թ.-ին ներկայացվել Աճուրդի գնահատող հանձնաժողովին /այսուհետ նաև՝ Հանձնաժողով/՝ խնդրելով «ԷԱՃԱՊԶԲ-2022/16-7-ԵՊԲՀ» ծածկագրով գնման ընթացակարգը /էլեկտրոնային աճուրդը/ հայտարարել չկայացած: Ի պատասխան դիմումի՝ ստացել ենք Հանձնաժողովի 21.11.2021թ.-ի գրությունը, որով **Հանձնաժողովը ևս ընդունել է այն փաստը, որ eauction.armeps.am էլեկտրոնային գնումների համակարգը 23.11.2021թ.-ին աշխատել է խափանումներով՝ նշելով, որ Հանձնաժողովը տեղյակ է եղել դրա մասին:** Նույն գրությամբ նաև նշվել է, որ խափանման ժամանակահատվածը կարող է հստակ արձանագրել միայն համակարգի սպասարկումն իրականացնող լիազոր մարմինը, ուստի Ընկերության կողմից սույն բողոքին զուգահեռ ներկայացվելու է նաև դիմում/հարցում լիազոր մարմնին՝ համապատասխան տեղեկությունն ստանալու համար, որի պատասխանն արդեն հուսով ենք, որ

կկարողանանք ներկայացնել սույն բողոքի քննության նպատակով հրավիրվելիք նիստի ժամանակ: Միաժամանակ, բողոքի արդյունավետ քննությունն ապահովվելու նպատակով նաև Ձեզ ենք խնդրում հնարավորության դեպքում լիազոր մարմնից ստանալ անհրաժեշտ տեղեկությունը՝ կապված համակարգի խափանման հստակ ժամանակահատվածի և այդ ընթացքում կայացած էլեկտրոնային աճուրդի չափաբաժինների մասին: Նույն գրությամբ Հանձնաժողովը նշել է, որ նպատակահարմար չի գտնում Աճուրդը հայտարարել չկայացած, քանի որ 50 չափաբաժիններից 27-ն արդեն չկայացած են նախահաշվային գները գերազանցելու պատճառով, ուստի վերահայտարարվելու են, և նաև այն պատճառով, որ կայացած 23 չափաբաժինների մասով բացվել են մասնակիցների նվազագույն գները, այդ թվում՝ նաև Ընկերության գները, և այդ պայմաններում ընթացակարգը չկայացած հայտարարելը մրցակցության տեսակետից ոչ կոռեկտ է: Նույն գրությամբ Հանձնաժողովն արձանագրել է մեկ այլ էական նշանակություն ունեցող հանգամանք ևս, այն է՝ **էլեկտրոնային աճուրդը մեկնարկել է 23.11.2021թ.-ի ժամը 11:00-ին և ավարտվել նույն օրը ժամը 16:30-ին:**

Հանձնաժողովի վերոնշյալ գրության (մերժման) կապակցությամբ նշենք, որ նույն գրության մեջ նշված, չկայացած հայտարարված 27 չափաբաժիններից 9-ի մասով Ընկերությունը ներկայացրել էր հայտ, հետևաբար, եթե eauction.armeps.am էլեկտրոնային գնումների համակարգն անխափան աշխատեր, Ընկերությունը հնարավորություն կունենար այդ 9 չափաբաժնի մասով գնային առաջարկն էլեկտրոնային աճուրդի ընթացքում նվազեցնելու և համապատասխանեցնելու առնվազն նախահաշվային գնին (և այդ մտադրությունն Ընկերությունն իսկապես ուներ), որպիսի պայմաններում առնվազն այդ 9 չափաբաժնի մասով ընթացակարգը կլիներ կայացած: Ինչ վերաբերում է Ընկերության կողմից հայտարկված մնացած 12 չափաբաժիններին, ապա նկատենք, որ այդ 12 չափաբաժիններից որոշների (թիվ 6, 32, 33, 34, 35 և այլ չափաբաժինների) մասով էլեկտրոնային աճուրդին Ընկերությունը մասնակցելու հնարավորություն չի ունեցել eauction.armeps.am էլեկտրոնային գնումների համակարգի խափանման պատճառով, ինչն էլ փաստացի գրկել է Ընկերությանը գնման գործընթացին մասնակցելու իր իրավունքն իրացնելու հնարավորությունից:

Ընդ որում, նկատենք, որ Աճուրդի հրավերի 8.2 կետի վերջին նախադասության համաձայն՝ Աճուրդ չի կարող կազմակերպվել ոչ աշխատանքային օրերին կամ աշխատանքային օրվա ժամը 16:00-ից հետո: Մինչդեռ, ինչպես պարզ է դառնում Հանձնաժողովի վերոնշյալ գրությունից, էլեկտրոնային աճուրդն ավարտվել է 23.11.2021թ.-ի ժամը 16:30-ին, ինչով խախտվել են Աճուրդի հրավերի 8.2 կետի վերջին նախադասության պահանջները: Այլ կերպ ասած՝ 23.11.2021թ.-ի ժամը 16:00-ից 16:30-ն ընկած ժամանակահատվածում էլեկտրոնային աճուրդի կազմակերպումն իրավաչափ չէ, և առնվազն այդ ընթացքում էլեկտրոնային աճուրդի դրված չափաբաժինների մասով Աճուրդը միանշանակ ենթակա է չկայացած հայտարարման: Իսկ թե որ չափաբաժիններն են կայացել այդ ժամանակահատվածում, կարծում ենք, որ առավել հավաստի կլինի տեղեկանալ Պատվիրատուից և/կամ Հանձնաժողովից:

Վերոգրյալ ամբողջի հիման վրա արձանագրենք, որ Աճուրդը չկայացած հայտարարելու մեր պահանջը հիմնվում է հետևյալ երկու անժխտելի փաստերի վրա՝

1. eauction.armeps.am էլեկտրոնային գնումների համակարգն աշխատել է խափանումներով, ինչը զրկել է Ընկերությանը վերանշյալ մի շարք չափաբաժինների մասով էլեկտրոնային աճուրդին (գնման գործընթացին) մասնակցելու իր իրավունքն իրացնելու հնարավորությունից,
2. էլեկտրոնային աճուրդը կազմակերպվել է սահմանված կարգի՝ Աճուրդի հրավերի 8.2 կետի վերջին նախադասության պահանջների խախտմամբ:

Աճուրդն ամբողջությամբ չկայացած հայտարարելու մեր պահանջը բխում է Աճուրդի բոլոր մասնակիցների շահերից, նաև վերջիններիս հավասարության և մրցակցության սկզբունքներից, և միայն Աճուրդն ամբողջությամբ չկայացած հայտարարելու միջոցով է հնարավոր լինելու ապահովել նշված սկզբունքների իրացումը, բացառել հնարավոր հետագա վեճերը, կանխել Աճուրդի մասնակիցների՝ հնարավոր վնասներ կրելը, ուստի վերագրյալ ամբողջի հիման վրա, ղեկավարվելով «Գնումների մասին» ՀՀ օրենքի 7-րդ, 37-րդ, 46-րդ, 50-րդ հոդվածների, ՀՀ կառավարության 04.05.2017թ.-ի թիվ 526-Ն որոշմամբ հաստատված թիվ 1 հավելվածի 14-րդ կետի 6-րդ ենթակետի, Աճուրդի հրավերի 8.2 և 11.1 կետերի դրույթներով՝

ԽՆԴԴՈՒՄ ԵՆՔ

Պարտավորեցնել «ԷԱՃԱՊՁԲ-2022/16-7-ԵՊԲՀ» ծածկագրով գնման ընթացակարգի /էլեկտրոնային աճուրդի/ գնահատող հանձնաժողովին ընդունել որոշում գնման ընթացակարգը չկայացած հայտարարելու մասին:

Կից ներկայացնում ենք՝

1. Բողոքարկման վճարը վճարելու վերաբերյալ ապացույց,
2. Քաղվածք իրավաբանական անձանց պետական ռեգիստրի գործակալությունից,
3. «ԷԱՃԱՊՁԲ-2022/16-7-ԵՊԲՀ» ծածկագրով գնման ընթացակարգի /էլեկտրոնային աճուրդի/ հայտարարության և հրավերի տեքստերը,
4. «ԷԱՃԱՊՁԲ-2022/16-7-ԵՊԲՀ» ծածկագրով գնման ընթացակարգի /էլեկտրոնային աճուրդի/ գնահատող հանձնաժողովի 24.11.2021թ.-ի նիստի թիվ 3 արձանագրության պատճենը,
5. 23.11.2021թ.-ի՝ գնահատող հանձնաժողովին ուղղված դիմումի պատճենը,
6. Գնահատող հանձնաժողովի՝ Ընկերության 23.11.2021թ.-ի դիմումի պատասխան գրության պատճենը,
7. Հավելված N 1.1-ի պատճենը:

«ԼԵՅԿՈ» ՍՊԸ-ի տնօրեն

Գագիկ Ալեքսանյան



25.11.2021թ.